

Vilbachatar dži andre Anglija

Pre Slovensko hin jekh gav, kaj bešen 2 780 nipi, lendar hine 1 870 Roma. O gav pes vičinel Vil'bacha (Bystrany), hin andro okresis Novejsis (Spišská Nová Ves). Ke Vil'bacha hin but Romen murimen khera, al'e o Roma dživen odoj tiž andre čorikane khera, ča avka zmarde le kaštendar, bl'achendar. Le Romen nane buti, vaš oda mušinen te phrel te kerel buti andre aver štat.

Varesave Roma sas imar andre Belgia, Švicarsko the Ňizozemsko. Kodoj kamenas te chudel e buti the o azilos, al'e na ačhile kodoj, avle pale pre Slovensko. Palis e Slovensko gejl'a andre EU, ta peske o Roma phende, hoj zumavena andre Anglija. Amen gejl'am te dikhel, sar kodoj dživen varesave romane famel'iji.

E Květa Šandorovo dživel andre Anglija imar trin berš. Lakero Rom kodoj gejl'a anglal, bo sas les kodoj famel'ija. Sar peske arakhl'a kher the buti, vičind'a la romňa, jak te avel pal leste the le čhavenca. Dživel pes lenge mištes, phiren andre buti u zakeren peske šukar love pro dživipen. Ňiko na dikhel pre lende či hine kale či parne. Kana bešenas pre Slovensko, ta tosara uštile u na džanenas, so majinen te kerel. Varekana sas buti, al'e ča phari buti perdal o murša, le romňijenge Ňiko buti na delas. Frima love, na sas chaben, renti pro čhave. Kamenas te dživel feder.

Kana pes o Roma dodžandle, sar dživen o Šandorovci andre Angl'ija, kamle te džal pal lende, pal o feder dživipen. Odgejle peršo ča o murša. O romňija ačhile khere, pre savoreste sas korkore. Kerenas savoro vaš o kher, so kerenas o murša, hordinenas o košta, pharavenas len, so jegaver. Na džanenas, kana lengere Roma stradena o kher the e buti, kaj te šaj džan pal lende.

Vaš o murša andre Anglija na sas savoro ajso loko. Na džanenas anglicko čhib. Bešenas pre kopa - andro jekh kher the biš manuša the buter. Sovenas ča kavka pre holo phuv. Kamenas, kaj pal lende te aven lengere čhave the o romňija, stradkerenas e buti sar diline. Vil'bachatar odgele šelthependa murša. Pro agor peske savore arakhle buti - akana jekhbuter keren buti ko chaben abo keren sar murara. Savi buti hin, ta len.

Varesave Roma kamen te avel pale pre Slovensko, te cinel peske khera u te bararen peskere čhaven khere, al'e varesave pre Slovensko imar te džal pale na kamen. Pherdo Roma akanakes dživen feder, sar dživenas. Arakhle savoro, so kamenas. Imar len hin, so te del andro čaro. Na bešen andre kaštune khera u o čhave phiren žuže. Mi del lenge o Del bacht the sastipen.

Milan Šenki

Amaro gendalos Radio I Rota januaris/februaris 2007

http://www.dzeno.cz/?c_id=13364